

施愚山全集

第一函
五十五册

施愚山先生學餘文集卷之十四

遊記

使廣西記

順治八年辛卯秋八月 皇帝婚禮成上 皇太后徽號九月遣使詔赦天下時
奉使無專官臣閔章以刑部主事與使廣西廣西地險遠歲為期是時天下初定
水陸驛不備使者畏糧遇舟車之絕輒三四日不得發衡山以南種火而食人雜
虎豹行明年三月始達桂林宣 詔書如典禮明日謁定南王定南王者孔氏名
有德拓地定廣西者也建藩獨秀峰下貴重無與比而巡撫王公一品巡按王公
荃可聞閔章名間嘗為王言至則王相勞苦命前席具言其平生及用兵粵西曲
折已賜食王笑曰君來厚幸往粵地阻兵使者數輩多反自衡永間孤手闢此土
監司郡守皆君同榜蓋徧遊觀吾所置吏士使諸郡為治裝閔章辭謝曰使於斯
職也義無客遊王顧盼叱咤自豪言出皆諾無敢後至是色微怩強笑曰何聞若
名士故與若驩孤豈肯忘它客者邪已又曰君奉 詔書錄黃發諸郡例取諸郡
吏奉詔月日還報事乃訖今廣西郡縣荒遠非數月不悉致何坐守鬱鬱也此中

江山奇奧可娛客卽徧遊兩粵亦何不可君行矣撫按兩王公目余諾謝出時桂城無傳舍又重違王意念期遠乃下灘江抵平樂梧州二郡所過陽朔諸山稜疊峭詭下涵激碧不可殫狀作粵江賦留蒼梧旬日暑雨晝晦蠻洞水多蛟涎毒不可飲挽舟又難上蒼梧備兵僉事彭君爌力促余遊粵東遂出私錢買棹乘江漲順流東一日抵肇慶古端州也分巡僉事沈君才鼎留避暑為十日飲假館松臺過端溪購得數硯又三日至廣州五羊城登越王臺問陸賈說南越王陀處大噉荔枝而西秋七月溯平樂聞賊李定國破衡永薄桂林矣知平樂府尹君明廷亟止余勿往曰俟王師破賊解圍行未晚也居頃之定南王自殺桂林城潰浮屍蔽江下余亟道蒼梧東歸道梗困甚所在山澤盜起剽掠乃取詔書及郵符畏敵繒中隱姓名與賈人俱至韶州獲見海南道林公嗣環巡按廣東御史楊公旬瑛二公執手賀無恙飭將吏驛送復出郵符乘傳行始余之困於蒼梧也守將戒嚴夾江置礮壘矢石令無縱一人一艇而余從舟載藥物或聞王以下諸公謬相重意橐中裝多固尼余行是時吏民有敢走者輒斬米斗一金聞賊乘勝至人相視哭余使謂其帥請盡棄舟助戰艦裸身歸帥義之以小艇送出境是時桂林之變惟

巡撫王公先引疾去餘或死或亡罕全者余以定南王從吏出遊回次平樂得東
向未幾平樂陷其守尹君死之而余以先發得免後數歲詔使之役悉歸行人
諸部曹遂無復奉使者

遊龍洞山記

華不注龍洞皆歷下諸山之最著者華不注距城十五里而龍洞之遠倍之山寺
盡燬故遊者絕少丁酉九月余同嚴給諫子餐登華不注因戒從者為龍洞之遊
會風雨中止凡官於齊及東西往來者十不得一遊焉己亥夏五月視學既竣念
不可失龍洞乃偕藩使袁君參臬陸君戎帥劉君往山皆積石其西巖曰錦屏丹
壁蒼蘚日月返照爛若披錦鸛雀蝙蝠多巢石罅間一穴深廣銜石甕二不知所
自始今亡其一無級可攀避兵者縋而入嘗活數百人其東巖橫入山腹者為龍
洞洞口空明可布廣席稍進則深黑以炬行乍俯乍仰石乳沾衣屨不移時達於
山之陽余大笑曰昔張公養浩紀遊云蒲伏蛇行幾死不得出至比退之登華山
今何易甚也復入達於山之陰列坐酒數行陸君詩成予次之劉君又次之並書
石上劉有二歌者操吳音佐酒聲出洞中繚繞木末客皆盡歡余復問龍潭命土

人前導西北行里許得之石池泓然兩崖壁立舊傳潭深數尺今視之纔尺許歲旱禱雨輒應宋元豐二年封順應侯祠在錦屏峰下有宋碑是遊也先二日戒期次日雨至是則微曦出岫輕風在衣山上下十里礪壑聲皆潺潺諸公適無事能不辭逖余為主人劉君攜歌者又益以善酒日暮而別具遊之勝惜乎山空無人不能止宿觀素月之照錦屏也

玉函山記

玉函山在齊郡城南二十里皎然若几案一名卧佛山余乘興偶出覓筍輿兼策杖徑造其巔向之皎然几案者隱然在萬山中稍缺其北郡城當之俯視迷離惟明湖荷菱城外流泉浮青繚白嵒華二山如列眉上有碧霞宮皆石屋南望泰山不甚高若可兄事而指臂聯也世傳山有鳥曰王母使者漢武登之得玉函化白鳥飛去事見酉陽雜俎余謂山形差小非登封臨幸之所石徑巉削無可容輦道世所傳殆非也然自有山以及漢武不知幾萬載矣漢去今又數千載矣漢武即果至亦萬古之須臾耳而山以漢武名是何無盡者待傳有盡不朽者藉名速朽也天下之山川賴人以顯者類如是豈好名之病山川不免與抑人自名之而山

川不有與士大夫無獨游者余興至則遊不偕賓從塵纓既盡解衣御風嗒然知浮名之非故而造物之冥冥不可得而名也獨遊之樂視與衆為樂甚也作玉函山記於石屋時己亥夏五月二十有七日

白嶽游記

齊雲巖之於黃山若附庸國稱白岳者大之也相傳世廟時禱祀輒應羣相尋於白岳矣入山六七里為桃花洞天故邈邇仙棲真處其下為桃花磯夜聽水聲潺湲深林中一燈熒熒遠近明滅愴恍物外質明躋級抵柵厓石壁洞開高可旌旗廣可車騎是為天門其蜿蜒門外戟髯向人者柵也石上有汪司馬伯玉銘從天門虎巖至榔梅菴見一山離立若擎菡萏心知為香爐峰左右鐘鼓山如翼雲氣氤氲直通帝座數折抵飛雨崖得三姑五老諸峯而五老為最蒼顏素骨後先列坐中一峯昂首戴九松若危冠晞髮適從奴荷素琴命琴者高子拂絃作梅花三弄余亦鼓一再行逸響崩雲山上松風謾謾傳五老笑語鏗然響答頃之復有紫虛道人者携麈尾披鶴氅導余登玉屏絕頂則黃山天都峯縹緲來接而羣山皆履帶下矣日暮仍宿桃花洞客問何如廬山余笑曰珠簾飛雨去廬山瀑布遠而

香爐五老娟秀過之但少怪石可為廬山小友頃當移尺一報匡君也然吾聞黃山三十六峰出其一足抵白岳而其境幽邃阻深軒轅浮丘公得私為窟穴遊屐罕至人情之耽近遺遠望崖而返卽觀遊已然矣

西山遊記

官京師二年西山日在眉睫間而未得往遊也遊則自丙申四月始西山巍峩延亘千餘里士大夫踪跡所及僅屈指一二為某峰某寺云譬之以蠡測海謂盡海則未也謂之非海則不可夫山亦若是已矣距城四十里為承恩寺寺雖壯故平壤無泉石折而出得二寺曰淨德曰隆恩竝有松數株佳者髣髴慈恩寺松隆恩視淨德尤勝以其依山麓獨有泉也泉之源曰水盡頭逶迤左折流入寺門會日暮止宿其後層巖壁立松柏際天夜寂風駭殷若奔雷砉如裂石風止響窮爽然深省旦日渡濁河登石景山大風劃平地作水紋深寸許騎者墮輿者仆再宿而遊香山香山者明世宗所謂西山諸峰獨有翠色者也其泉曰甘露石曰蟾蜍曰香爐最勝者為東軒神宗駐蹕手書來青軒三字墨跡巋然尚存閨章諦視良久留詩而去可三里為碧雲寺泉出寺中流繞僧舍汨汨焉泉穴作亭覆以古木舉

酒盤薄水氣襲衣余詩曰老樹數圍陰古寺流泉百折抱空亭蓋實錄也有明全盛時物力既豐乘輿數出戚畹及中貴布金亡算故西山諸刹皆金碧莊嚴而香山碧雲為最一亭一榭費累鉅萬春以杏花秋以柿葉紛紅深赤非復人間惜乎遊非其時也然繫跡於官動不自由得三日乞假縱轡一往亦足以濯淄塵稍謝丘壑矣但恨時迫不得見天壽諸陵耳為之三歎

化成巖小記

亭於化成之巖曰語石以其與石相對堪共語也巖在宜春縣北大石礪礪矗立數丈好事者覆之以閣若不知有石者余見之失笑謂若屈偉丈夫帕其首作三日新婦耳盍去之郡丞孫君曰諾於是發屋而石出徙閣而亭成稍進為李衛公讀書臺巖洞炯然其色深碧如菡萏初開而拳其半名之曰青蓮洞撤巖下敗屋數楹見巖勢側出如覆掌又如老人俯首舉袖揖客於烟霧間客之同游者皆曠若發覆僧之居是巖者亦說以為非吾故巖也於是與客舉酒歡甚山水之有亭榭猶人之高冠長佩也在補其不足不得揜其有餘向之人非不亟賞之也愛護之已甚而失之覲面者也予非能有所加也因勢損益相之物外而遇乎其天者

也是不可以不記

游春浮園偶記

泰和蕭伯玉太常自記其春浮園為時所稱美蓋因其高下鑿溪壘山一亭一逕皆竭能殫智求異於人伯玉既下世而余分守湖西宗伯錢公牧齊屬余以其猶子孟昉且謂能世其家而其園可惜固余所願遊者壬寅春行部至泰和連雨浹旬一日亭午方霽遂至園所時孟昉客虔州求所刻春浮園記不可得地近城郭又數苦兵去伯玉未三十年樵牧者皆得而往矣獻吉悼外舅詩云田園樹大身先葬書畫樓成畫不開嘗讀之淒然廢卷今伯玉既以猶子為後而其竭能殫智之所經營卒歸之蔓草尤可悲也然亭臺半圯丘壑猶存斷壁寒崖矗然斗絕回岡曲渚忽又奔屬客至者皆不辨其為園也孟昉又別構小圃薈叢妍好園中人能具蘭舫筍輿酌家釀薦園茗余徜徉其中遇嘉石奇樹則解衣箕踞坐良久驅吏人遠去或呼園丁問花木種植剝治接養灌溉之方纖細疏記窮日乃返不恨園無主人也得詩凡五首逝者有知將酌酒酹伯玉焉

遊九華記

昔劉夢得嘗愛終南太華女几荆山以為此外無奇秀及見九華始自悔其失言是說也嘗竊疑之而李太白以山有蓮花峯改九子為九華予舟過江上望數峯空翠可數約畧如八九仙人云其山外峻中夷由青陽西南行則峯攢岫複環奇百出而入其中則曠以隱由山麓褰裳則寒泉數十百道噴激沙石碎玉衣絃而入其中則輿以靜蓋巖壑盤旋白雲翳鬱道士之所族處者是為化城一峯屹然四山雲合若羣龍之攫明珠者是為金地藏塔循簷送目虛白之氣遠接江海而四方數千里來禮塔者踵接角崩叫號動山谷若疾痛之呼父母蹈湯火之求救援道士爭緣為市幾以山為壘斷矣寧復知有雲壑乎於是擇其可游者曰東巖其上有堆雲洞師子石僧屋數間刻王文成手書文成聚徒講學游憩於斯有東巖燕坐詩今求其講堂無復知者天柱峯最高俯視化城為一盂絕壁矗立亂山無數所謂九十九峰者迷離莫辨如海潮涌起作層波巨浪青則結綠紫則珊瑚夕陽倒蒸意眩目奪蓋至此而九華之勝乃具惜非閒人不得坐卧十日招太白夢得於雲霧間相共語耳遊以甲午歲十月從之者查子素先徐子道林

珠按自記云是

記十年前所構今括殘稿得之則存十五六或討其太畧余謂正恐蕪爾山猶人也人識面而全體斯具記山者豈必一丘一石之不遺哉禹貢及水經注千古遊

記鼻祖不可髣髴杜老有云佳處領其要亦猶愈於路程本子也時乙巳歲除前一日

毛氏桂林記

桂林者江山縣西五里小山也舊名茅石岡以其業於毛氏也又稱毛氏桂林巖石麗綺盤嵌離立寬受千人隘容一趾詭勢駭形羆虎出沒叢桂連蜷不種自植鳥啄猿騰繁英委藉微風拂林香被戀谷芝草松苓卉藥競集雷仆喬柯苔蒙菌附往復降登迷惑來跡余方箕踞長嘯而江邑主人送酒適至山尊數酌頽然輒醉歸徵邑乘闕無紀載因謂主人曰江陽多名山予皆不及遊獨遊此林便幽絕可永日憶十年前見粵西桂郡人皆新桂無惜者今江山路交閩粵兵車時會地又偏城郭烏知後來者不盡此桂而薪之也何非君物色告我則陰崖老樹中恐乏幽人之跡矣主人曰有是哉不可俾無聞於來世乃記之主人萬介公以進士令江山實啟余遊者也

碧巖記

余至湖州之三日問太守吳公以山水之最則首舉碧巖碧巖故弁山高處太守嘗與客遊憩其上而湖之人罕至焉凡湖之山皆濱水可舟游而碧巖距水八九

里石磴欹危逕草沒屐芒履竹杖畢力而後至焉林木荒蕪風灌灌然暮寒侵骨
有僧雪波者出其詩具言山中勝事屋後石壁十丈許甬以老藤攢拏偃曲下覆
石泉中有物如蜥蜴蜿蜒五色禱雨則取之或時不見謂之龍子春夏之交藤花
盛開和笋作饌風味絕殊地產茶與廟界相敵然皆寄生箬簷巖石間茲以雲霧
僧蟻附而擷之曰野茶最高者曰雲峰尤清絕不多得余嘗過匡廬五老峰啜雲
霧茶蓋此類也寺東有洞如龍口草木旁綴為髯逕西則珠簾泉下瀉為瀑布時
秋晴水僅相屬不能作崩崖砰石聲憑巖面太湖澄泓無際拍臆盪胸巖石皆累
峭初至山腰時望之若崇墉苔蘚繡錯山稱碧巖或以此蘇文忠嘗題字其上今
剝落猶髣髴可辨聞山後有精舍三四皆鉅觀會朝雨逕滑從者蹒跚遂取故道
歸山高寒難久居士大夫非有濟勝之具又耽冥搜者恐不能為是遊也書以告
之好事者戊申七月二十四日

西山遊記

西山之可遊者五六余得二焉一曰翠巖一曰香城香城距南昌五十里在山之
阿翠巖則麗乎山原矣余先其難者從青山左折崩崖裂石中側行屢息抵香城

寺日已向暮香城者相傳晉高僧白雲住此土人依以避兵僧焚香巖谷氣成雲
兵望之皆層城不敢犯故以名焉前山最高者為蕭仙峰或言仙蕭氏或言昔有
仙人吹簫其上云又左折踰數嶺逕益險猿挂行二十餘里為翠巖寺寺西則洪
崖煉丹井赤峽峭束泉爭道怒流砉然雷驚石圻或散溢被石面如巾拂其崖下
渟泓以深者井也坐久作歌曰水瑟瑟兮石齒齒中有人兮洪崖子石髮綠兮巖
扉開雲車揭兮來不來明日過金嶺尋丁道士問養生家言道士蓋嘗師張逍遙
或以逍遙為地仙余出香城道過逍遙故居俗所稱虎洞者也叩其弟子具言逍
遙不知書不事丹鼎嘗瞑坐石上夜衣羽衣禮北辰化去時年六十二所居虎穴
逍遙至則虎去人遂異之以為仙竟不知逍遙何許人也同余遊者為同邑高詠
阮懷休寧汪楫舟次各有詩康熙丁未重九前五日記

振衣石記

溯洪崖井而上百餘步一石獨峙坐容三四人俯觀瀑泉數十道砰轉谷間可濺
衣憑流測源畢景忘返其旁有舊刻云嘉靖癸亥冬武陽王洪泉奉命經此凡十
四字大如拳問土人莫能名余以筇杖擊石歌振衣千仞岡濯足萬里流之句遂名

曰振衣石記之而去客言上數里有兩石如輪水激之作鐘磬聲異日當更尋之
游玉華山小記

登快閣西望玉華山蜿蜒城下謂可縱馬立至也出城過水田間蹊路傾欹輿人
皆側足行久之過赤峽有老柏數十株自此登陴涉嶺折入邃谷佳石如林可坐
可倚太常蕭公伯玉置莖草龕前有巨石屹然相望山豁江見足爽人意進一里
許高樹婆娑得石蓮寺其林杪懸棧飛亭跨越寒澗前輩楊寨雲書其亭曰浮槎
其陽曰飛練蓋泉出萬山驚流戛石雨則瀑布旱亦鳴玉泉甘如醴相傳蕭楊兩
先生過此輒盤礴坐卧為竟日留時孟昉烹葵進酒攜書畫數卷展對泉上予喜
甚用卷中韻留詩亭壁日晡穿山腹陟玉華頂瞰江城如指掌而三顧諸山氣若
素練垂垂下接於江趨歸及山麓雨將至矣予又成峰頂一詩孟昉曰玉華舊無
名作今自公始請並書之以貽後人其詩曰抱疴深愧未歸身野鳥山樵暫主賓
絕磴全消松閣暑碧苔長護石崖春忽聞清磬知鄰寺細酌寒泉見古人散帙憑
欄堪永日僧厨葵藿不愁貧翠柏戎戎挂夕曛振衣江色嶺頭分顧山明滅數峯
雨蜀口青冥幾樹雲畫壁荒祠陰慘澹出城孤塔暮氛氤風流前輩誰過此笙鶴

應從此日聞

游青又記

枕青原而夾出於山谷者為青又予聞之藥公以其山緬邈不盡故名土人相傳或謂之青幽云境杳邃略似武林九谿十八谿自五笑亭而左穿山腋側下窅然以深左右詰曲緣磴行余至之日落葉在林履聲颼然與諸子登釣臺水清石峭顧而樂之前二里許得飛雲石礪砢仄疊望之若垂天之雲又涉磴數重大石橫出徑隘甚從人私語曰盍鑿諸予笑謂山靈所留以拒車馬客也逕再折層崖峻峽石駭水飛奔雷曳練藥公名之曰漱青客皆選石列坐聆翫淹留委情棲寄自青原寺至此可五里委蛇複嶂中其進若阻其往若迴惟一縷泉聲淙淙隨人不絕山中草木蒼翠如早春將至一僧舍寒香發林則山梅已華矣延目前峰遙青無際景昃而歸途既半坐谿中盤石與藥公論生死鬼神事良久又言此山之陽十里為天玉山上有瀑布從飛雲石畔一峽橫入舊有千佛樓今皆山榛隰苓矣山之幽固不可勝窮也同游者五人刻石紀姓氏康熙乙巳季冬之六日

藥地禪師私智

胡萬咸以盧毛大可奇齡方位白中通諸子咸鳳蒸

附詩 晴冬風日好乘興恣攀躋嵐氣盈襟袖泉聲逐杖藜天圍一握小峯截
片雲低暗穴熊留館荒陂虎印泥香冥忘去住曲折失端倪倪置屋綠茶園分流
潤參畦野梅寒早發谷鳥鵬先啼白飯烹葵美青林采藥迷惠莊心共遠支許
手同攜不盡青青色重看萬嶺西

柑林遊記

臨江厥土宜柑江畔洲渚間列植以千萬計予謂當坐飲其下會南昌陳君士業
蘄州顧子赤方山陰徐子伯調吾邑黃子文在陸子在璞後先至於是柑林之
遊甫渡江則碧玉林立流火散珠纍纍下垂夾道委地客皆頽首側身而過之席
地小飲酒數行輒浮大白引柑橘故實行觴政予以病止酒是日數十觴不醉顧
子慨然曰自有此柑林未有使君與我二三子惜不令太白子瞻輩見之其不可
不以告後人俾知柑林之遊自我輩始予笑曰身後名何若生前一杯酒姑為我
強醉日暮酒盡野人獻橘又命取斗酒隻雞繼之坐待明月有頃月出皎然江山
雪色沿流放舟緩棹容與江漲波平水鳥鳴咬咬與舟俱下遠見城頭燈火來迎
影落水中作數十燭龍蜿蜒無際未知太白桃李之讌子瞻赤壁之遊果勝此否
於是客皆次第賦詩屬予記之予謂柑林不足記而諸君子數千里畢集一時賦
詩紀盛則宜有聞於後者也遂為之記

石蓮洞記

歲之丙午十月甲戌舟泊吉水桐江灣風日晴好與故人沈治先賀學林及少子恪策騎尋石蓮洞蓋羅文恭先棲隱處也行可三十里得二石室其一如覆盂高不盈丈周廣三之今為僧廬其一石扇欹陁稍稍暗委蛇數折則豁豁空朗上豁旁通洞門高處刻文恭手書梅關二字先生嘗齋居獨坐或閉目終日不語士大夫數來問學山故多虎置短垣署曰虎豹關虎遂絕迹人驚異之從學日眾環洞而廬者亭館相屬洞之南為正學書院今門前雙檜巋然獨存余攀崖危坐顧謂客曰若知文恭之樂乎方其廷對第一時天下方盛公年又甚少朝廷四方快覩其文采謂且大用公偃蹇朝列枕藉於虎豹巖魅之宮數十年以終老何哉今雖講堂草閣蕩為寒蕪久矣嘗試策杖層巔極目長嘯四山震聾夕陽乍陰安知先生不往來其間乎乃歌曰谷風淒兮山木疎岵嶺無人兮誰與居瞻赤嶠兮望回車又歌曰朝白雲兮暮明月思美人兮坐超忽瑤草寒不死巖花開未歇歌罷而出谷口萬樹聲颼颼余與客皆陶然若有遇也是夕止宿僧為予言文恭年六十夜聞洞外人聲曰甲子年生甲子年與君相見月圓前公亟歸望前一日逝矣